



Rahotus kväänitten/norjansuomalaisten prosektia varten Finmarkussa

Lisärahaorningin suuntalinjat, päätetty fylkinraatissa 17. januarikuuta 2023

Oversatt til kvensk Kainun institutti – Kvensk institutt 28.02.2023

1. Oorningin ympäri

Kuurto-orningi oon ökonoominen toimi joka stimuleeraa ja eesauttaa rekiunaalista aktiviteettia nasunaaliselle minoriteetille kväänile/norjansuomalaisille.

2. Mooli

Lisärahaorningi vahvistaa ja eesauttaa kväänin kieltä ja kväänitten/norjansuomalaisten kulttuuria Finmarkussa. Orningi eesauttaa olletikki näitä moolia:

- Vahvistaa ja lisätä kväänin kielen käyttöä, erityisesti lasten ja nuorten joukossa
- Lisätä osanottoa ja myötäolemista eli involveerinkiä kväänitten/norjansuomalaisten kulttuurihin, erityisesti lasten ja nuorten joukossa
- Lisätä kväänin kielen ja kväänitten/norjansuomalaisten kulttuurin jakamista, erityisesti lapsile ja nuorile

3. Kuka saattaa hakea

Rahotusta saatethaan antaa institusuunille, organisasuunile, laakile ja seuroile, roikile ja privaatti-ihmisille.

4. Jakamisen kriteerit

- 4.1. Rahotusta saattaa hakea toimile, jotka eesauttava ja vahvistava kväänin kieltä ja kväänitten/norjansuomalaisten kulttuuria Finmarkussa.
- 4.2. Toimet häytyvä olla aikarajatut.
- 4.3. Pääreekelinnä oon ette tyhä toimet jotka viehään läpi Finmarkussa, saava kuurtoa.
- 4.4. Toimet joila oon laaja rekiunaalinen meininki, prioriteerathan.
- 4.5. Hakemukset missä panhaan painon kväänin kielen pääle, prioriteerathan.
- 4.6. Toimet lapsile, nuorile ja nuorile täysi-ihmisille prioriteerathan.
- 4.7. Pääreekelinnä oon ette ei anneta mithään lisärahaa promoteerinkiä varten.
- 4.8. Pääreekelinnä oon ette ei anneta lisärahaa seminaarhiin osanottoa, koulutusta, opintoreisuja jne varten.
- 4.9. Tavalisesti ei anneta kuurtoa tavalisheen triivauksheen.
- 4.10. Tavalisesti ei anneta kuurtoa ette ostaa kamppheita tahi muuhuun investeerinkhiin.
- 4.11. Lähtökohtasesti ei anneta rahotusta toimile, joista oon tehty arveluksen tahi jotka kuuluva muihin fylkinkomuunin kuurto- tahi lisärahaorningihin.
- 4.12. Korkein hakemussumma lisärahaa varten oon kr 50 000.

5. Vaatimukset hakemukselle

Hakemuksen lähätethään elektroonisesti fylkinkomuunin nettilaian hakemusseeman kautta.

Hakemuksessa häytyy olla:

- 5.1. Kuwailu toimen moolista
- 5.2. Toimen geograafinen ala
- 5.3. Aikaplaana toimen läpiviemistä varten
- 5.4. Kuwailu plaanatuista aktiviteetista
- 5.5. Budsetti mikä vastaa yhteen aktiviteetitten kans
- 5.6. Rahotusplaana, missä oon hakijan omaosa ja maholiset muut rahotuslähteet
- 5.7. Kuwailu toimen moolijouko(i)sta, ja lisäksi kunka hakija aikoo sauttaa moolijoukon-/joukot
- 5.8. Hakijan eelytykset/kompetansi ette viehä läpi toimen
- 5.9. Ylinäkymä maholisista yhtheistyöpartnerista. Plaanatun yhtheistyön dokumenteerathan sopimusten, päätösten, aikomusilmutuksen tahi vastaavan avula.

Jos hajethaan rahotusta muilta ko fylkinkomuunilta, niin se häytyy tulla esile hakemuksessa ette keneltä. Jos muut oon jo antanheet lisärahaa, niin siitä pittää panna dokumentasuunin myötä hakemuksheen.

Hakemuksen käsitelhään sen tieon pohjalta minkä oon pantu hakemuksen seemhaan. Kaikki se relevantti informasuuni mistä kysythään suuntalinjoissa, pittää olla myötä hakemuksessa.

Hakemukset jotka tulhaan fristitten jälkhiin, epätäyeliset hakemukset tahi hakemukset jotka oon oorningin ulkopuolela, ei saa asiakäsittelyä ja hyläthään.

6. Hakemuksen fristi

Lisärahaoorninkhiin kuuluu kaks fristiä joka vuosi: 15. novemperikuuta tulevaa budsettivuotta varten ja 15. maikuuta saman budsettivuoan sisälä, jos budsettipostissa oon vielä rahoja jäljelä.

7. Hakemusten käsitteleminen

Hakemukset käsitelhään järjenmyötäsesti määrätyitten kriteeritten jälkhiin ja kokonaisen perspektiivin perustheela. Päätökset tekkee asiankäsittelijän neuvosta se fylkinraatin jäsen, kellä oon eevastaus kulttuurista. Kaikki hakijat saava kirjälisen päätöspreivin sillon ko asiaprosessin oon lopetettu.

8. Valittaminen

Päätöksistä saatethaan valittaa hallintolain § 28 jälkhiin. Valitus pittää olla kirjälinen, ja sen häytyy lähättää fylkinkomuunille 3 viikon sisälä siitä aikakohasta ko mellingin päätöksestä oon saatu, vrt. hallintolaki § 29. Vaatimukset valituksen mallista ja sisälyksestä saatat lukea tästä: hallintolaki § 32. Jos fylkinkomuunin päätös pyssyy sen jälkhiin ko valituksen oon otettu vasthaan, valituksen lähätethään fylkinkomuunin valituskomitealle. Valituskomitean päätös oon lopulinen.

9. Lisärahan maksaminen

Fylkinkomuuni maksaa lisärahat räkingin pohjalta. Hakijat jotka saava kuurtoa, lähättävä räkingin fylkinkomuunille jälkhiin ko het oon ottanheet vasthaan päätöspreivin ilman asialista viivyttelyä, ja viimisthään päätöspreivin aikafristin sisälä.

10. Ehot lisärahan käytöstä

- 10.1. Lisärahan käytethään niin ko hakemuksessa oon kuwailtu, ja niitten ehoitten jälkhiin jotka oon mainittu varmistuspreivissä.

- 10.2. Lisärahan saaja pittää ilmottaa ette toimi oon saanu kuurtoa fylkinkomuunilta. Fylkinkomuunin loogo häytyy näkyä presentasuunimateriaalissa, jonka maholisesti laitethaan toimen eestä.
- 10.3. Jos toimessa tapahtuu tähelisiä muutoksia, budsetissa tahi aikaplaanassa, pittää tämän sopia kirjalisesti fylkinkomuunin kans. Fylkinkomuuni häytyy hyväksyä muutokset. Jos tapahtuu tähelisiä muutoksia joista ei ole kirjalisesti sovittu fylkinkomuunin kans, niin saattaa olla ette piät maksaa lisärahan takaisin.
- 10.4. Jos lisärahaa ei käytetä ehoitten myötäsesti, tahi jos lisärahan oon annettu hakijan vääritten tieoitten pohjalta, se saattaa olla ette sie piät maksaa lisärahan takasin, kokhoonansa tahi osittain.

11. Raporteeraus ja kirjanpito

- 11.1. Kirjanpion ja raportin lisärahan käytöstä lähätethään fylkinkomuunille maholisiman nopeasti sen jälkhiin ko toimen oon viety läpi, ja viimisthään 1. februaarikuuta vuoen sisälä jakamisen jälkhiin.
- 11.2. Raportissa pittää olla kuvvailu siitä mitä oon tehty (aktiviteetit) ja minkä mooliroikan oon sautettu prosektin kautta. Jos lisärahan oon annettu kurshiin, tapahtumhaan tahi vastaavhaan, pittää olla tieto siitä kunka moni oon ollu myötä.
- 11.3. Kirjanpion pittää näyttää kunka lisärahan oon käytetty, ja sen panhaan ylös niin ette sitä saattaa verrata sisälelähätetyn budsetin kans.
- 11.4. Jos raporteeraus vailuu, saattaa olla ette lisärahan otethaan takasin ja vaaithaan ette sen maksethaan takasin.

12. Voimhaanastuminen

Suuntalinjat astuva voimhaan alkain 1. februaarikuuta vuona 2023.